

續弘簡錄元史類編

續弘簡錄元史類編卷之四

皇清詹事府少詹事仁和邵遠平戒山學

天王二

成宗皇帝諱鐵穆耳世祖之孫太子真金第三子母曰弘吉刺氏以至元二年九月庚子生帝二十二年太子薨二十五年世祖命帝討叛王合丹削平遼左諸部三十年受皇太子寶撫軍北邊明年甲午春正月世祖崩諸王大臣遣使計軍中夏四月壬午帝至上都左右部諸王畢會先是御史中丞崔瑄得玉璽于故臣之家監察御史楊桓辨其文曰受命于天既壽永昌上之帝母元妃群臣咸曰神寶之出實當宮車晏駕之後此天意屬于皇太孫也至是手授帝甲午帝卽位百官朝于大安閣詔曰朕惟太祖聖武皇帝受天明命肇造區夏列聖相承光熙前

緒迨我先皇帝體元居正以來文物典章大備臨御三十五年
薄海內外罔不臣屬宏規遠畧厚澤深仁有以行皇元萬世無
疆之祚我昭考早正儲位德盛功隆天不假年四海舛望顧惟
眇質仰荷先皇殊眷往歲之夏親授皇太子寶付以撫軍之任
今春宮車遠馭奄棄臣民乃有宗藩昆弟之賢戚畹官僚之舊
謂祖訓不可以違神器不可以曠體承先帝夙昔付託之意合
辭推戴情切意堅朕勉徇所請于四月日卽皇帝位可大赦天
下尚念先朝庶政悉有成規惟慎奉行罔敢失墜更賴宗親勲
戚左右忠良各盡乃誠以輔台德按元文類作王構撰張伯淳養蒙集亦載之追尊
皇考曰皇帝尊母元妃曰皇太后庚子遣攝太尉兀都帶爲大
行皇帝請謚于南郊志作甲辰日事此告天請謚之始定諸王駙馬賜與依往
年大會例賜金一者加四爲五銀一者加二爲三戊申太白晝

見巳酉雲南行省以所定路府州縣來上上路二下路十一下
州四十九中縣一下縣五十授金齒土官阿魯爲孟定路總管
五月庚戌朔太白犯輿鬼壬子祭太陽太歲火土等星于司天
臺紫微星于雲僊臺戊午上大行皇帝尊諡冊曰繼志述事非
盡孝無以致其誠表行誅功非定諡無以稱其實肆邦彛之具
舉維天道之協從欽惟先皇帝膺錄受圖體元立統蚤從藩邸
茂著徽稱爲治之基有常經國之畧則遠役用衆智獨斷于衷
總攬萬幾如指諸掌內朝廷外侯牧等威迭降罔不適中先教
化後刑名本末相循悉皆有序在御迨踰于三紀推尊合冠于
百王若夫惠及困窮恩加降附慎終如始無非好生之心保小
以仁特示包荒之量擴盛猷之鴻鬯沛膏澤之醇釀方其泰運
漸亨戢濟多難離綱復綴混一四方傳檄而氛祲開渙號而方

維定乾旋坤轉不足喻其機雷厲風飛不足比其捷至于嘉言
博采惟典謨訓誥是師諸藝畢延盡陰陽圖緯之學考音律以
創字畫參古今以制禮儀振耀威靈肅陳兵衛白旄黃鉞時則
親巡犀甲雕弧止于不用聖德弗可及已神功茂以尚焉蓋文
之所加者深武之所服者大是用升崇吉祔揆卜剛辰謹奉冊
寶上尊諡曰聖德神功文武皇帝廟號世祖伏惟睿靈俯垂昭
鑒思皇多祐申錫無疆

見元文類
王構撰

并上世祖后尊諡曰昭睿順

聖皇后又上皇考尊諡冊曰周武膺符首建文王之號晉武踐
祚遂正文考之稱比擬未必盡同追崇蓋有獎典顧惟寡昧嗣
續基圖天付有家動欲繩其祖武考若作室今曷致其孝思欽
惟皇考皇帝元德溫恭聖功果育顯諸神而藏用膏其施而未
光當夫預國政親軍旅之時無非審治體得民情之事弭兵日

本廣先皇柔遠之仁立教天庠示聖代崇儒之意身衛斯文于不朽人被其惠而莫知誠以鋤奸去惡而爲明匪徒視膳問安之爲孝乃有其德而無其位獨豐于功而嗇于年感十載霜露之懷永言維則紹一統乾坤之業有開必先思貽令名允爲首議謹奉冊寶上尊諡曰文惠明孝皇帝廟號裕宗有嚴吉享用

薦徽稱伏惟神靈歆其昭格

見養蒙集張伯淳撰

四川散毛洞主覃順來

貢升其洞爲府已巳改皇太后所居舊太子府爲隆福宮詹事院爲徽政院乙亥命札散知樞密院事加御史大夫月兒魯太師知樞密院伯顏太傅樞密副使月赤察兒太保戊寅立捕鹽人賞格六月庚辰朔日食庚寅減雲南歲貢馬復以鐵木兒平章政事甘肅饑禁釀酒乙未以加上尊諡詔天下免所在本年包銀俸鈔及內郡地稅江淮以南夏稅之半已亥封乳母楊氏

爲趙國安翼夫人何氏爲冀國夫人辛丑禮宋使家鉉翁遣還

家鉉翁充祈請使至燕安置河間至是年踰八十乃賜衣遣歸甲辰詔脩世祖實錄丙午太

陰犯井秋七月己未立保定路之博野泰安州之新泰平陽路

之武鄉芮城陵川蒲縣改侍衛都指揮使爲隆福宮左右都威

衛使壬戌詔中外崇奉孔子按寧獻王所著通鑑博論千至元十八年有云帝信桑門之惑盡焚

中國道藏關儒道二教爲外學貶孔子爲中賢尊桑門爲正道及考元史止于是年焚燬道書而不見所謂貶孔子之實惟成

宗卽位卽詔崇奉孔子則當時或有施戊辰罷肇州宣慰司入

遼東道減八番等處所設官二百一十六員按八番新附時稱九十萬戶設官四

百二十四員及遣官覈實止癸酉以不忽木段貞並平章政事

詔諭遼國王敢木丁來朝或有故則令其子弟及陪臣入質命

太師月兒魯將兵守北邊八月庚辰太白晝見戊子初祀社稷

用堂上樂歲以爲常己丑遣范文虎監浚通惠河立新河運糧

千戶所戊申太陰犯畢太白犯軒轅九月丁巳太白經天丙寅
太陰掩填星辛未犯軒轅乙亥犯平道遣禿古鐵木爾等使閣
藍冬十月辛巳詔凡蠲免田租令佃戶應輸田主者亦如所蠲
之數毋得私收壬午太白犯左執法癸巳太陰掩填星乙未犯
井金齒孟愛何渠長遣子來朝卽其地立軍民總管府辛丑詔
京畿糧儲充足歲海運米百萬石者今減十之七帝諭省臣曰
中書職務卿等皆懷怠心又不約束吏曹使選人淹滯桑哥雖
姦邪然條屬憚其威政事無不立決卿等其約束曹屬有不事
事者笞之乙巳遣南巫里速木荅刺繼沒刺牙毳陽使者各還
國初征瓜哇時嘗招瀕海南巫里等國遣人來附以禁商泛海留京師至是弛海禁始遣還十一月丁未朔
帝朝皇太后于隆福宮上玉冊玉寶己酉太陰犯亢壬子罷江
淮湖廣江西行樞密院併入行省庚申太陰犯畢令河西僧人

依舊助役毀宣政院所刻河西藏經板甲子以何瑋參知政事
罷海北海南市舶提舉司立覆實司癸酉太白犯房詔改明年
爲元貞元年十二月癸未歲星犯房丁亥犯鉤鈴壬辰太陰犯
鬼庚子犯房又犯歲星用帝師奏釋京師大辟三十人杖以下
者百人賜諸鰥寡貧民鈔二百錠曲靖澂江普安等路癸官各
以方物來貢是月太傅伯顏卒按是歲節氣正月一日壬子立
春二月二日癸未驚蟄三月三
日癸丑清明四月四日甲申立夏五月五日甲寅芒種六月六
日乙酉小暑七月七日乙卯立秋八月八日乙酉白露九月九
日丙辰寒露十月十日丙戌立冬十一月十一日丁亥大雪
十二月十二日丁亥大雪

元貞元年乙未春正月癸丑命只兒合朗爲御史大夫乙卯太
陰犯填星及畢壬戌以國忌卽大聖壽萬安寺飯僧七萬詔道
家復行金錄科範乙丑以行院旣罷仍賜行省長官虎符領其
軍庚午以楊炎龍爲中書左丞阿老瓦丁呂天麟並參知政事

壬申立北庭及曲先塔林二都元帥府癸酉歲星犯東咸罷瓜

沙二州屯田二月丁丑翰林學士承旨留夢炎請老厚賜遣之

壬午罷江南茶稅增鈔三千錠入江西歲額

典章云今有司勸茶戶種茶以時採

摘仍禁放牧損壞

癸未熒惑犯太陰戊子思州田曷刺不花雲南彛卜

木四川洞主查閭王金齒帶梅混冬等來覲壬辰太陰犯平道

癸卯犯歲星勅廉訪司官令省臺同選三月乙巳朔發鈔五萬

錠市馬給貧乏軍庚戌太陰犯填星壬子禁來朝官歛所屬俸

錢戊午罷福建徽州銀場提舉司以東作方殷停諸不急營造

壬戌地震太陰犯房丙寅增置蒙古學正以各道廉訪司領之

夏四月勅上都大都揚州從前撥賜大乾元寺大興教寺大護

國仁王寺酒店湖泊出辦錢物仍聽官收分給毋許僧道私設

人員

見典章

庚寅太陰犯東咸癸巳遣烏撒同知牙那木假兵部

尚書使馬荅兒的陰庚子立衛候掌謁掌儀掌饗諸司及官正

內宰隸隆福宮癸卯設各路陰陽教授仍禁陰陽人不得游諸

王駙馬之門

典章云試選陰陽教授占筭三命五星周易六壬數學

閏月癸丑歲星犯房

甲寅太陰犯平道乙卯犯亢丁巳掩房巳未罷打捕鷹房總管

府及司籍局用薄歛等庫爲皇太后建佛寺于五臺山立校釐

招討司蘭州河清三日上下三百餘里五月庚辰詔各省存儒

學提舉司一其餘悉罷升江南諸縣爲州以戶爲差戶止四五

萬者爲下州五萬以上者爲中州下州官五員中州官六員凡

爲中州者二十八下州者十五又以連州戶不及額降路爲州

辛巳罷行大司農司加麥術丁平章軍國重事何榮祖爲昭文

館大學士議中書省事甲申免自今五月以前逋欠錢糧丁亥

太陰犯南斗六月壬子世祖實錄成甲寅併左右兩江宣慰宣

撫二司爲廣西兩江道宣慰司都元帥府治靜江仍分司邕州
癸亥立蒙古軍都元帥府于西川徑隸樞密院庚午立西域衛
親軍都指揮使司勅凡上封事者命中書省發視然後上聞秋
七月乙亥准江南地稅輸鈔丁丑太陰犯亢己卯詔舉中外儒
吏兼通者每道歲貢二人省臺立法考試中程者用之所貢不
公罪舉者定職官坐賊經斷再犯者加本罪三等倉庫官吏盜
所守錢糧一貫以下笞十貫杖二十貫加一等一百二十貫徒
一年每三十貫加半年滿三百貫者死計賊以至元鈔爲則典章
云官員因事受財枉法者不叙不枉法者殿罷三年方聽
告叙再犯者終身不叙凡遇公私罪犯上司不得擅斷決甲申
歲星犯房八月己酉太陰犯牛壬子犯壘壁陣已巳以駙馬那
懷知樞密院事九月乙亥用帝師奏釋大辟三人杖以下四十
七人已卯運米十萬石于權場故廩以備北塞省寧夏行省入

甘肅甲午太陰犯軒轅戊戌犯平道冬十月癸卯有事于太廟

帝曰親享之禮祖宗未嘗舉行朕將躬祀之命獻官迎導入廟

奉世祖裕宗冊寶納諸各室

先祔廟時以綾代玉冊至是始造成故並納之

甲寅勅自

今監察御史廉訪使有所按覈州縣官與本路同鞫路官與宣

慰使同鞫宣慰司官與行省同鞫辛酉辰星犯房壬戌犯鍵閉

通考云江西省臣言銀冶歲課萬一千兩而未嘗及數民不堪命自今從實辦之不爲額

戊辰太白晝見太

陰犯房十一月甲戌太白經天立江浙金銀洞冶轉運司乙酉

太陰犯井丁亥犯鬼戌戌升江西寧都會昌二縣爲州十二月

丙辰太陰犯軒轅甲子犯天江丁卯禁諸王駙馬輒召有司官

吏減海運工費鈔一貫每石計六貫五百文著爲令是月立皇

后伯岳吾氏初命郡縣通祀三皇如釋奠宣聖禮伏羲以勾芒

氏配神農以祝融氏配黃帝以風后力牧配俞跗以下載于醫

書者十人從祀兩廡有司春秋行事以醫師主之

通考云元貞間建三皇廟

內有三皇并歷代名醫像東有神機堂內置銅人鍼灸圖二十有四凡五臟旁注爲溪谷所會各爲數以導其源委又刻鍼灸經于石其碑之題篆則宋仁宗御書至元間自汴移此

是歲帝以京師米貴益廣賑糶法設肆三十所發米七萬石糶之後增至四十萬石每爲豪強巧取乃命有司籍貧民戶數驗口給之減時值三之一

二年丙申春正月己卯上思州叛賊黃勝許攻剽水口思光寨湖廣行省調兵擊破之勝許復入交趾壬午太陰犯輿鬼丙戌太白晝見安西王傳請立王相府帝曰去歲阿難荅已嘗面陳朕諭以世祖定制今復奏請豈欲以四川京兆悉爲彼有耶賦稅軍站皆朝廷所司今姑從汝請置王相府惟行王傳事丁亥太陰犯平道庚寅犯鈎鈴命禿赤爲御史大夫乙未回紇不刺罕獻獅豹藥物二月己亥朔自六盤山至黃河立屯田置軍萬

人辛丑立中御府丙午禁軍將擅易侍衛軍蒙古軍以家奴代役者罷職仍令其奴別入兵籍畀以本主資產之半軍卒擅更代及逃歸者死丁未太陰犯井括蒙古戶漸丁充行伍孩幼稍長之丁也三月壬申以不忽木爲昭文館大學士平章軍國事還太原平陽路蒲萄園爲民業罷四川馬湖路所進獨本葱癸酉有言晉王甘麻刺及太師月兒魯有異圖者樞密院鞠之無驗帝命言晉王者死言太師者謫從軍乙酉太陰犯鈎鈴夏五月戊辰朔免兩都徭役甲戌詔民間馬牛百取其一羊不滿百者亦取之惟色目人及數方取丁丑太陰犯平道庚辰土番叛掠階州遣兵討之庚寅禁諸王駙馬招戶令有分地功臣戶與民均納供需詔諸徒役者限一年放歸毋杖六月乙巳太白犯天關以調兵妨農免廣西今年田租丁巳太白犯填星癸亥太陰犯井

秋七月癸酉定茶鹽轉運司印鈔提舉司運糧漕運司官以三年爲代雲南福建官吏滿任者准給驛歸主午填星犯井太白犯輿鬼

續資治云勅官吏受賂初既辭伏繼審覆而有司徇情致令狡辯者加等論罪

已丑命行臺御史鉤校隨省理問所案牘諸提調錢穀官所部有逋欠者勿遷

叙八月丁酉朔禁舶商毋賣金銀過海諸使海外者不得爲商立肇州屯田萬戶府庚子太陰犯亢太白犯軒轅癸卯太陰犯天江乙巳立捕盜賞格凡告捕強盜一名者賞鈔五十貫竊盜半之應捕者又半之皆徵諸罪人無可徵者官給乙卯太陰犯天街太白犯上將龍興路隕霜殺禾九月戊辰太白犯左執法壬申太陰掩南斗甲戌罷民間鹽鐵爐竈命沿海巡禁私鹽定浙東福建湖廣兩稅法秋稅止輸糧夏稅則雜以木棉布絹絲綿土物丁丑太陰犯壘壁陣甲申雲南乞藍部長荅刺率諸蠻

來降以其地爲雲遠路已丑太陰犯軒轅河決杞封丘祥符寧陵襄邑五縣贛州賊劉六十聚衆萬餘建僞號江西左丞董士選討平之冬十一月丁卯蠻洞荅馬刺一本王遣其子進象十六丁丑太陰犯月星及天街庚辰犯井丁亥犯上相增明年海運糧爲六十萬石調芍陂屯田軍萬人修大都城戊子太陰犯平道壬辰犯天江省雲南栢興府入德昌路十二月戊戌立徹里軍民總管府

本古產里寰宇記作車里

復置蒙棣剛等甸軍民官癸卯定

諸王朝會賜與太祖位金各千兩銀七萬五千兩世祖位金各五百兩銀二萬五千兩餘各有差丁未太陰犯井乙卯犯進賢復司天臺觀星戶增置侍御史二員釋在京繫囚百人

大德元年丁酉春正月辛卯以王慶端爲中書右丞張斯立叅知政事建五福太乙神壇時

通考云建南郊

二月丙申蒙陽甸長遣弟

阿不剌來獻方物卽其地立通西軍民府升全州爲全寧府濟
寧寧陽鎮爲縣改隸州巡檢司爲河曲縣戊午遷國羅斛羅羅
斯各遣使來朝己未改福建省爲福建平海等處行省徙治泉
州減福建歲織段三千疋其車渠帶工別立提舉司掌之庚申
以改元赦天下詔曰朕荷天地之洪禔承祖宗之丕祚仰遵成
憲庶格和平比者藥木忽兒兀魯思不花朵兒朶懷等去逆效
順率衆內附畢會宗親釋其罪戾適星芒之垂象豈天意之儆
予宜推一視之仁誕布更新之政可改元貞三年爲大德元年
於戲側躬修行咸懃奉若之誠革故從新聿底雍熙之治咨爾
臣庶體朕至懷見典章三月戊辰熒惑犯井庚午以也先鐵木兒
平章政事梁德珪一名暗都刺爲右丞八都馬辛爲左丞癸酉太陰
掩軒轅大星甲戌詔併各省鎮守軍福建併爲五十三所江浙併爲二百二十七所江西

併爲六十四所

丁丑封諸王鐵木兒不花爲鎮西武靖王丁亥禁正月
至七月捕獵庚寅五臺山佛寺成皇太后親往祈祝御史李元
禮諫止之不聽夏四月癸巳朔日食丙申勅御史臺不立選惟
監察御史首領官聽御史臺自擇各道廉訪使必選用蒙古人
或色目世臣子孫其次叅以色目漢人各省文案行臺差官檢
覈近侍傳奉特旨令臺憲擢用者必俟奏明後任行臺御史秩
滿有効績者或入內臺或聽中書省遷調廉訪使亦如之其不
稱職者省臺擇人往代未歷有司者先授以牧民官經省臺同
選者聽御史臺自調中書省或用臺察之人亦令與御史臺同
議各官府憲司官毋得輒入體察一應擬除悉依舊制五月丙
寅河決汴梁發民夫三萬塞之戊辰追收諸位下爲商者制書
驛券定強盜姦傷事主者首從悉誅不則止誅首盜餘各刺配

再犯者並誅癸酉太白犯鬼積尸氣乙亥太陰犯房丁丑禁民
間捕鷺鷹鷄貴州葛蠻及平伐九寨平珠六洞內附各立長官
司上思州賊黃勝許遣其子志寶來降帝曰勝許反側不足信
如其悔罪自至則當復官其子命賜衣遣之甲午賜湖廣叅政
崔良知鹽課鈔千錠旌其廉貧乙未太白晝見丙辰詔僧道犯
姦盜重情者聽有司專決免亦奚不薛歲貢馬及雨鵲秋七月
定在外慶賀行禮以守土官爲班首武職雖品大者不得攬越

見典章

庚午太陰犯房辛未罷蒙古軍萬戶府入曲先塔林都元

帥府定奉使外邦者假以會同館使副職銜不給制命丁亥免
上都酒課三年河決杞縣蒲口命河北廉訪使尚文相視八月
丁巳祲星出奎諭諸王自今出獵悉自供億給衛士牧馬外郡
者糧毋仰食于民九月辛酉朔祲星復犯奎丙寅罷括兩淮民

田已止省南丹州安撫司改立慶遠南丹溪洞軍民安撫司詔
邊遠官已優升品級而託故不赴者奪其官冬十月存恤諸郡
被災之家詔曰比者各路水旱疊見損害田禾疫氣漸染人多
死亡今被災人戶應納稅糧損及五分以上者全行蠲免雖被
災例不及免者以十分爲率量減三分其餘諸處普免二分病
死之家或止存老幼單弱別無得力之人者並免三年差稅貧
窮不能自存者官爲養濟江南新科夏稅今年悉與蠲免已納
在官者准作來歲正賦見典章辛丑減上都商稅歲額爲三千錠
戊午太白經天增吏部尚書一員十一月壬戌禁權豪僧道及
各位下擅據鑛炭山場并私奪民田其獻田者加罪罷保定紫
荊關鐵冶提舉司還其戶八百爲民戊辰增太廟牲用馬戊子
太白經天溫州妖人陳空崖坐禪設法僞稱羅平國正治元年

平陽州官捕擒之十二月戊戌禁外郡戍卒封樁錢軍官不以時給反出已錢貸之徵其倍息者福建平章高興言漳浦縣大梁山產水晶乞割民百戶採之帝曰不勞民可勞民則勿取壬寅朔洞蠻內附立長官司二甲辰太白經天丙午太陰犯軒轅欽察都指揮使床兀兒攻破巴隣之地還擊海都軍敗走之甲寅太陰犯心閏月壬戌太陰犯壘壁陣詔軍戶賣田者由所隸官給文券丙子太白犯建星淮東饑弛湖泊禁仍聽正月捕獵是歲順德等路旱樂壽交河疫死者六千五百餘人和州歷陽縣江漲漂沒民居萬八千五百家衡州鄱縣山崩水溢並蠲租賑糧三萬餘石

二年戊戌春正月壬辰禁諸王駙馬受投獻公私土田乙巳出糧十萬石賑北邊新附貧民罷土番碣門安撫司運司改立碣

門魚通黎雅長沙西寧遠軍民宣撫司以翰林王惲闔復王構
趙與熙王之綱楊文郁王德淵集賢王顥宋渤盧摯耶律有尚
李泰郝采楊麟皆耆德舊臣清貧守職特賜鈔二千一百餘錠

是月特祭太廟用馬一牛一羊鹿野豕天鵝各七餘如舊

是爲特祭

之始將奠牲盤酌馬湏蒙古太祝升詣第一座呼帝后神諱致祝語以次列室如之禮畢則以割奠之餘撒于南橋星門外名曰撒茶飯尤謂禮所重

二月辛酉

歲星熒惑太白聚于危乙丑立浙西都

水庸田司專主水利以張九思梁德珪何榮祖並平章政事楊
炎龍爲右丞以歲入不敷罷中外土木之役后妃諸王所需非
有旨勿給罷建康金銀銅冶轉運司歲辦金悉責有司辛未太
陰犯左執法丙子犯心癸未禁諸王駙馬毋擅祀嶽瀆其從者
毋假控鶴佩帶擾民三月丁亥朔加封東鎮沂山爲元德東安
王南鎮會稽山爲昭德順應王西鎮吳山爲成德永靖王北鎮

鑿巫閭山爲貞德廣寧王歲與嶽瀆同祀夏五月辛卯罷海南
黎兵萬戶府以黎蠻屯田府事入瓊州安撫司壬辰命中書省
遣官監雲南四川海北海南廣西兩江廣東福建等處六品以
下選戊戌太陰犯心巳酉立致用院六月庚申罷江南門攤稅
江南在宋時行兩稅法自阿里海牙下湖廣改科門攤每戶一
貫二錢增課五萬錠宣慰張國紀復請科夏稅與門攤並徵湖
湘重罹其害御史以爲言帝命罷之禁諸王擅發令旨其越例開讀者併所遣使
拘執以聞壬戌太陰犯角置奉宸庫秋七月癸巳太陰犯心汴
梁河決遣尚書那懷御史劉廢塞之自蒲口首事凡築九十六
所八月壬戌太陰犯箕九月辛丑太陰犯五車南星癸卯太陰
犯五諸侯巳酉犯左執法庚戌立吉贛汀三州屯田命廣海左
右江戍軍依舊制二年更代冬十月壬戌太白犯牽牛置蒙古
都萬戶府于鳳翔戊寅太陰犯角距星令御史臺稽察樞密院

案牘十一月丙申罷雲南行御史臺爲陝西行臺移治京兆置雲南肅政廉訪司己亥太陰犯輿鬼辛丑辰星犯牽牛壬寅太陰犯右執法十二月戊午太白經天括諸路馬除牝孕携駒者己未填星犯輿鬼乙丑太白犯歲星太陰犯熒惑庚午填星入輿鬼太陰犯上將詔逃軍復業者免役三年給陣亡軍妻子衣糧甲戌彗出子孫星下己卯太陰犯南斗辛巳定諸稅錢三十取一歲額之上勿增是歲甘肅沙州鼠傷稼江浙水大都檀州兩邕山東河南淮揚燕南山北蝗各蠲租如例賑糧十五萬餘石釋在京囚二百一十九人

三年己亥春正月癸未朔下存恤軍民詔曰朕自卽位以來重念屯戍征進軍士久服勞苦管軍官輿魯官務加休息不得妄有科配前詔已嘗及之今樞密院奏江南平定之後軍馬別無

調度所司不知撫養致使軍前告退者多起補之間官吏因而作弊應嚴行禁治如有違犯酌輕重降黜至于張官置吏本以爲民小吏祿食不敷以致掊取爲害令中書省各添給俸米鰥寡孤獨除照常給賑外自後每名添中統鈔一兩遇天壽節加支二兩著爲令

見典章

丙戌太陰犯太白己丑中書省臣以星變

各引咎避位帝曰此漢人故事豈可一一倣之耶卿等但擇賢者任之自可挽回天意庚寅遣使問民疾苦除本年內郡包銀俸鈔免江南夏稅十之三增各路惠民藥局癸巳封藥木忽兒爲定遠王命哈刺哈孫爲左丞相丁酉太陰犯太微西垣上將戊戌犯右執法乙巳太白經天二月癸丑朔罷四川福建行省陝西行臺江東荆南淮西三道宣慰司置四川福建宣慰司都元帥府及陝西漢中道廉訪司己巳癸惑犯五諸侯壬申封吳

大夫伍員爲忠孝威惠顯聖王三月甲午命何榮祖定律令帝曰古今異宜不必相沿但取宜于今者戊戌癸惑犯輿鬼詔軍官受賊重者落職輕者降散官或決罰就職停俸期年許令自効夏四月己未太陰犯上將丙寅填星犯輿鬼太陰犯心庚午嚴捕淮浙私鹽驗所獲遷賞自通州至兩淮設巡防捕盜司十有九所五月壬午罷江南諸路釋教總統所放諸寺佃戶五十餘萬爲民丙申太陰犯南斗海南速古臺速龍探奔奚里諸番以虎象及抄羅木舟來貢己亥太白犯畢禁海商以人馬兵仗往諸番貿易六月癸丑罷大名路所獻黃河故道田輸租戊午以福建州縣官類多色目南人命以漢人叅用禁福建民冒稱權豪佃戶規免門役庚申太陰掩房丁卯癸惑犯右執法壬申歲星晝見秋七月己卯朔太白犯井丁未太陰犯輿鬼淮揚屬

縣蝗爲鶩啄食飛者以翅擊死詔禁捕鶩八月己酉朔太史奏
日食不應丁巳太陰犯箕戊辰太白犯軒轅大星己巳太陰犯
五車九月壬辰夜有流星色赤尾長丈餘光燭地起自河鼓沒
于牽牛之西有聲如雷癸巳罷括宋手號軍乙未太陰犯昴距
星丁酉太白犯左執法置河東山西鐵冶提舉司冬十月壬子
授皇后冊寶甲寅復立海北海南道廉訪司丙子太陰犯房十
一月庚辰置浙西平江河渠牐堰凡七十八所乙酉太白犯房
丁酉浚浙西太湖及澱山湖十二月己酉徙鎮巢萬戶戊沅靖
毗陽萬戶戊辰州均州萬戶戊常德癸酉諭中書省貨財出納
自今無券記者勿與以阿魯渾薩理平章政事是歲命皇姪海
山即武宗代寧遠王闊闊出鎮漠北賜馬二萬二千九百匹

四年庚子春正月丙申嚴京師惡徒之禁犯者黥刺拘役癸卯

復淮東漕渠二月丁未朔日食丙辰皇太后崩明日祔葬先陵
戊午太陰犯軒轅乙亥立烏撒烏蒙等郡置維摩州夏五月癸
未諭平章阿魯渾薩理曰集賢翰林乃養老之地自今諸老滿
秩者升之勿令輒去甲午太陰犯壘壁陣辛丑太白犯輿鬼太
陰犯昴復置延慶司六月丙辰加月赤察兒太師完澤太傅丁
巳太白犯填星甲子勅各省非奉命毋擅役軍吊吉兒蘸八等
國來朝秋七月甲戌朔上皇太后尊諡曰裕聖皇后升祔裕宗
廟辛卯熒惑犯井封乳母韓氏爲燕冀國順育夫人石抹氏爲
冀國夫人八月癸卯朔更定蔭叙格正一品子爲正五從五品
子爲從九中間正從以是爲差蒙古色目人特優一秩癸丑太
陰犯井甲子辰星犯靈臺上星閏月庚辰熒惑犯輿鬼以賀仁
傑平章政事九月戊午太白犯斗壬戌太陰犯輿鬼升英德州

爲路置廣東鹽課提舉司甲子太白犯斗改中御府爲中政院

掌中宮財賦營造事冬十一月壬寅朔免上都大都龍興明年

絲銀附近牧地免稅糧十之三徒罪各減一半杖以下釋之併

遼陽省所轄狗站牛站爲一輟耕錄云高麗以北名別失八里

者必經此其地極寒海亦冰自八月卽合至明年四五月方解

人行其上如平地征東行省每歲委官至奴兒干給散因粮頗

用站車每車以四狗挽之狗悉請人性站有十二月癸酉定江

北墾荒者四年起科初制三年起科恐貧民庚寅熒惑犯軒轅

癸巳太陰犯房是歲建康平江湖北浙東饑寧國太平旱賑粟

三十四萬九千三百石

五年辛丑春正月己酉太陰犯五車壬子犯輿鬼積尸氣奉安

皇妣裕聖皇后御容于護國仁王寺勅官吏犯賊及盜官錢事

覺雖遇赦免亦加降黜小吏犯賊者並罷不叙典章云禁止辛

遊街刑法

酉太陰犯心罷檀景兩州採金鐵冶及福建織繡提舉司二月
巳卯太陰犯輿鬼丁亥詔廉訪司官非親喪遷葬及以病在告
者不得離職軍民官或以地遠職早已除不赴任者奪職勿叙
巳亥永寧路總管雄挫曲靖路宣慰使忽林失來朝三月戊申
太陰犯御女戊午馬來忽等海島遣使來貢丁卯熒惑犯填星
巳巳熒惑填星相合夏四月壬申太陰犯東井癸巳禁和林釀
酒其諸王駙馬許自釀飲民間無釀具而儲酒者勿問五月癸
丑太陰犯南斗乙卯熒惑犯右執法商州隕霜殺麥丙辰河南
妖賊醜斯等伏誅雲南土官宋隆濟反攻貴州知州張懷德死
之丁卯太白犯井六月甲申歲星犯司怪癸巳太白犯輿鬼歲
星犯井秋七月戊戌朔晝晦暴風起東北大雨雹丙午歲星犯
井丁未命監察御史審覆宗正府罪囚檢刷宣政院案牘辛亥

太陰犯壘壁陣癸丑浙西積雨傷民田命役夫二千人疏導河道庚申辰星犯太白叛王合丹之孫脫歡自北來歸以暗伯阿忽台並知樞密院事八月諭行中書省宣慰廉訪二司列置諸路之上本以弭盜賊脩政事糾不法撫良民也近年于此畧而不問自今各脩乃職凡在所屬常加檢察期于政成民安諸路鎮靜而止有不稱任者省臺錄其實跡奏示黜罰其嶽鎮海濱名山大川風師雨師雷神各正官齋戒致祀有不敬者聽廉訪使糾彈

見典章

庚辰遣官分道慮囚累年不決者具疑狀申省臺

言議有星孛于東井歷紫微天市垣至九月乙丑凡四十六日

而減壬辰太陰犯軒轅御女乙未填星犯太微西垣上將冬十月丙寅朔畿內饑增明年海運糧爲百二十萬石戊寅武定路土官群則獻方物癸未太陰犯東井改鄂州爲武昌路丁亥定

軍官既受命而不時赴及差竣不卽還者准民官例違限六月
選人代之被代者期年始叙辛卯夜有流星大如杯光燭地自
北起近東分爲二星没于危宿十一月己亥歲星犯東井降容
象橫賓路爲州升昭州爲平樂府省泌縣入唐州丁未設肆三
十六所減直糶米賑京師貧民戊申太陰犯昴徭人藍頰率丹
陽三十六洞來降立長信寺領大幹耳朶怯憐口諸事湛然居士集云
每新君立另設一帳房極金碧之盛名幹耳朶十二月甲戌歲
後若立復自作之怯憐口謂習百工技藝者星犯司怪辛卯太陰犯南斗定凡盜人孳畜者取一償九然後
杖之是歲海都與篤哇大舉入寇皇姪海山躬督五軍破之射
篤哇中膝號遁去海都走死江湖溢東起通泰崇明西盡眞州
民被災死者不可勝計賑米八萬七千餘石

六年壬寅春正月癸卯詔千百戶等自軍中先事而逃者罪死

敗而後逃者杖罷之沒入其子女乙巳晉王甘麻剌薨庚戌江南僧石祖進告朱清張瑄不法十事下御史臺按問帝曰朕聞江南富戶侵占民田以致貧者流離轉徙卿等嘗聞之耶臺臣言富民多乞護持璽書依倚以欺貧民官府不能詰治宜悉追收爲便帝命速行毋越三日并諭自今僧官僧人犯罪御史臺與內外宣政院同鞫凡寺觀續置田土及民以施入爲名者並輸租充役乙卯築渾河堤長八十里禁豪家毋侵舊河定軍官除邊遠征戍外凡遇祖父母父母喪俱准終制蒙古色目人各從本俗有願守制者聽壬戌填星犯太微西垣上將二月庚午太陰犯昴西南彗叛遣也速帶兒劉國傑次第討平之癸巳帝有疾釋京師重囚發通州倉粟賑貧民三月丁酉以旱溢爲災詔赦天下大都平灤被災尤甚免差稅三年其餘災傷之地已

經賑恤者免一年今年內郡包銀俸鈔江淮以南夏稅及諸路

散辦門攤課程盡賜蠲免壬寅太陰犯輿鬼癸卯歲星犯井甲

寅太陰犯鉤鈴合祭昊天上帝皇地祇五方帝于南郊遣左丞

相哈刺哈孫攝事

此攝祀天地之始

夏四月乙丑朔太白犯東井丁卯

出赦雲南諸部蠻獫狁戊寅太陰犯心戊子修廬溝上流石徑山

河堤庚寅太白犯輿鬼五月乙巳給貧乏漢軍地及五丁者一

頃四丁者二頃三丁者三頃其孤寡者存恤六年逃散者招諭

復業戊申太廟寢殿災六月癸亥朔日食太史院失推策下中

書議罪填星犯太微西垣上將甲子建文宣王廟于京師

時京師未

有孔廟國學寓于他所左丞相哈刺哈孫奏始建之

乙亥太陰犯斗秋七月癸巳朔熒惑

填星辰星聚于井庚子太陰犯心戊午犯熒惑辛酉以忽都不

丁爲中書右丞八月乙丑熒惑犯歲星己巳犯輿鬼辛巳太陰

犯昴壬午太白犯軒轅九月丙午熒惑犯軒轅隆興民譌言括
童男女至有殺其子者命誅爲首三人癸丑太陰犯輿鬼丁巳
太白犯右執法冬十月甲子徙浙東宣慰司治慶元鎮遏海道
置大同路黃花嶺屯田罷軍儲所立屯儲軍民萬戶府壬午熒
惑犯太微西垣上將十一月辛卯填星犯左執法乙未辰星犯
房癸卯太陰犯昴己酉犯軒轅辛亥命合荅知樞密院事十二
月庚申朔熒惑犯填星辛酉雲南地震戊辰又震禁使臣枉道
馳驛乙巳歲星犯輿鬼乙亥太陰犯輿鬼庚辰熒惑犯太微東
垣上相癸未太陰犯房是歲賑浙江饒州糧二十九萬一千石
給京師貧民鈔十一萬七千錠有奇初太宗正所定刑獄俱任
蒙古必闍赤掌橐其中枉誤甚多至是始令譯史立漢文卷委
蒙古漢御史各一員閱視審覆然後待報革諸衙門濫設貼書

見典章

七年癸卯春正月戊戌太陰犯昴甲辰犯軒轅巳酉弛饑荒所
在山澤河泊禁乙卯誅朱清張瑄盡拘其海船軍器丁巳令樞
密院選軍士習農業者教軍前屯種二月辛未以木八刺沙阿
老瓦丁並中書平章政事尚文爲左丞朶台董士珍參知政事
壬申詔樞密院宗正府自今政事與中書共議然後奏聞遷調
官員諸司不得擅奏雖經特旨用者于例未允亦聽覆奏戊寅
太陰犯心帝語省臣曰比有以歲課增羨希求爵賞者此非措
斂于民何從而出自今除元額外勿以羨增作正數罷江南都
水庸田司通考云詔和林軍六年更戌仍給鈔以周其乏三月巳丑朔定凡子孫或因
貧困或信師巫說誘擅發祖父墳墓移棄尸骸貨賣塋地者與
惡逆同罪見典章庚寅遣使宣撫循行天下以郝天挺等十三人

充七道使並給銀印江浙平章脫脫遣發朱清張瑄家屬出金
珠重賂之脫脫以聞帝曰朕以江南任卿果能爾真男子事也
其益恪勤乃事賜黃金五十兩壬辰以大都比歲不登罷修建
僧寺工役乙未中書平章伯顏梁德珪段貞阿魯渾薩理右丞
八都馬辛左丞月古不花參政迷而火者張斯立等皆以受朱
清張瑄賂罷甲辰增給京朝官祿米外任官無職田者亦驗俸
量給戊申大一統志成夏四月癸亥太陰犯東井徵陳天祥張
孔孫爲集賢大學士郭筠昭文館大學士皆同議中書省事丙
寅太陰犯軒轅乙亥歲星犯輿鬼太陰犯南斗劉國傑敗宋隆
濟于墨特川擒斬之甲申熒惑犯太微垣右執法丁亥歲星犯
輿鬼五月己丑開上都大都酒禁壬辰辰星犯東井濬上都灤
河甲寅禁諸王駙馬毋輒杖州縣官吏縱獵擾民山東隕霜殺

麥閏月戊午朔日食壬戌禁犯曲阜林廟戊辰太陰犯心丞相
完澤卒六月己丑發蒙古軍萬人分鎮瓜沙二州隘口仍立屯
田以供軍癸卯詔凡軍官子弟年及二十者與民官子孫同係
直一年方許襲職萬戶于樞密院千戶于行省百戶于本萬戶
乙巳罷四川宣慰司復立行省修甘肅阿合潭曲尤濠俾通漕
運秋七月壬戌禁僧人以修建寺宇爲名賁諸王令旨乘傳擾
驛丙寅命哈刺哈孫爲右丞相阿忽台爲左丞相戊寅歲星犯
軒轅己卯太陰犯井詔朝臣三品以下年七十者各升散官一
等致仕乙酉熒惑犯房八月辛卯夜地震平陽太原尤甚村堡
移徙地裂成渠人民壓死者衆摧圯宮觀千四百餘區遣使分
道賑濟癸巳太白犯氏甲午熒惑犯東咸太陰犯牽牛乙巳歲
星犯軒轅辛亥熒惑犯天江九月丙寅太白晝見以太原平陽

地震禁諸王所部擾民仍減歲飼馬之半辛未熒惑犯南斗罷
僧官有妻者甲戌太陰犯東井乙亥太白犯南斗都城火命樞
密院增巡防兵壬午辰星犯氐冬十月丁亥太白經天戊子以
江浙年穀不登減海運糧四十萬石癸巳以行省官久任多與
所隸編氓聯姻害政詔互遷之命只爾合忽知樞密院事給大
都文宣王廟洒掃戶五乙未發雲南叛寇餘黨來京師庚子改
平灤爲永平路升普定府爲路以故知府容直妻適姑爲總管

真志云容直効順賊未平而沒其妻能宣力戎行故有是命

辛丑太陰犯東井庚戌翰林國

史院進太祖太宗定宗睿宗憲宗五朝實錄辛亥增蒙古國子
生百員十一月甲寅朔改順元路隸湖廣升全寧府爲路己未
太白經天辛酉雨木冰丙寅填星犯進賢戊辰太陰犯井己卯
犯東咸十二月甲申朔加封眞武爲元聖仁威玄天上帝乙酉

許貧民釀酒丙戌太白經天熒惑犯壘壁陣詔蒙古軍居山東
河南者免遠戌甘肅丙申太陰犯東井辛丑犯明堂丁未犯天
江庚戌彗星見約盈尺在室十一度入紫微垣奉使宣撫奏罷
七道賊汚官吏一萬八千四百七十三人審冤獄五千一百七
十六事賊罰鈔四萬五千八百六十五錠

八年甲辰春正月己未以災異故詔天下曰去歲地震平陽太
原爲甚一切差發稅糧自大德八年爲始與免三年隆興延安
上都大同懷孟衛輝彰德真定河南安西等路被災人戶與免
二年大都保定河間等路亦免一年江南佃戶承種田土者私
租太重以致小民困窮今普減十分之二著爲例至國家財物
自有常制此者諸人妄獻田土戶計山場窩冶增添課程無非
微名貪利生事害民嗣後悉皆禁治其軍站民匠各戶往往托

名僧道影蔽差徭自今有願出家者必本戶丁多差役不闕及

有昆仲侍養父母許赴原籍官司陳告勘實方准剃度違者斷

罪歸俗

見典章

乙丑復置遂平新蔡真陽太和沈丘潁上柘城城

父郊舞陽十縣丙寅以塔思不花爲中書右丞趙仁榮參知政

事辛巳禁諸王駙馬往遼東捕海東鶻者毋給驛癸未增築河

防自榮澤至睢州凡十有八所是月平陽地再震已修民居復

壞二月丙戌增廣國子生二百員選宿衛大臣子孫充之降莊

浪路爲州省隴千縣入德順州甲午詔父子兄弟有才者許並

居風憲丙申分軍屯田于薛出合出谷甲辰世祖實錄成進金

書節文一冊三月乙丑彗星始滅凡見七十四日戊辰詔諸王

駙馬分地所置達魯花赤惟用蒙古人三年依例遷代軍官擅

離所部者悉遣還翼軍人不告所部私歸者杖之軍民逃奴有

獲者卽付其主誘匿者論罪仍追逃奴鈔充獲者賞夏四月丙

戌詔諸路畏吾兒合迷里自相訟者歸都護府與民交訟者聽

有司專決丁未分教國子生于上都五月癸未

應作丑

朔日食辛

酉濬吳江松江海口役租戶萬五千人免其租人十五石設行

都水監董其程復良田百餘里汝寧妖人李曹廬妄言得天書

惑衆伏誅秋九月庚申復伯顏梁德珪八都馬辛迷而火者等

官御史杜肯構中丞何通上章諫不報以阿里爲中書平章政

事張祐脫歡並參知政事癸酉諸王察八兒篤哇遣使來附賜

幣六百匹潮州颶風起海溢民溺死者衆改封皇姪海山爲懷

寧王冬十一月壬子詔內郡江南人凡爲盜黥三次者謫戍遼

陽諸色及高麗人三次免黥謫戍湖廣盜禁獮馬者初犯謫戍

再犯者死丁卯復免天下僧道租戊辰以鐵古迭兒爲御史大

夫壬申增海漕米爲百七十萬石十二月庚子復立益都淘金

總管府辛丑封諸王出伯爲威武西寧王

通考云是年冬始定國子生蒙古色目漢

人三歲各貢一人

九年乙巳春正月丁巳太陰犯天關甲子犯明堂己巳犯東咸

定考試教官法初充學錄教諭試詞賦二韻小賦并二韻經義

論論孟義明經解題各一道學正升教授試詞賦全賦一道經

義各從所業大義一道明經解題二道

見典章

二月丁酉封諸王

完澤爲衛安王藥木忽兒爲威定王庚子議行郊祀禮

元初代有拜天

之禮皆徇用國俗郊祀未嘗舉行至是哈剌哈孫言祭天尤國

禮天夏至方澤禮地西漢元始間始合祭天地歷東漢至宋分

祭合祭之說茫無定見今當循三代之典祀天南郊其方澤之

禮當俟再議按周禮壇壝三成近增至四成宜去其一以合陽

位其器用陶匏席用葵縣漢唐而後

辛丑令御史臺翰林集賢

多陳玉帛宜取古今制損益行之

院六部于五品以上各舉廉能識治體者三人行省行臺宣慰廉訪司各舉五人

通考云詔求山林間有德行文學識治道者

免大都上都龍興差

稅內郡包銀俸鈔一年建大天壽萬寧寺詔致仕官止一子應

承蔭者並免係直家貧者給半俸終身三月丁未朔諭仲春已

後農民力作其較有司慎毋生事煩擾或有小罪卽與疎決勿

禁繫以妨農時

見興章

甲寅熒惑犯氐戊午歲星犯左執法以高

興平章政事仍樞密副使夏四月庚辰太陰犯井乙酉大同路

地震壞官民廬舍五千餘間壓死二千餘人懷仁縣地裂二所

湧水盡黑漂出松栢朽木遣使賑之己丑東川路蠻官阿葵來

獻方物壬辰太白犯井五月丁未大都旱遣使持香禱雨戊申

徵原任陝西儒學提舉蕭顥赴闕命有司給以安車戊午立衍

慶司癸亥歲星掩左執法以地震改平陽爲晉寧太原爲冀寧

並蠲今年商稅省鬱林縣入貴州六月丙子朔立皇子德壽爲
皇太子詔赦天下賜高年帛親年七十別無以次待丁者許就
近遷除外任官五品以下並減一資致仕官褒加一秩諸罪囚
淹繫疑不能決者釋之流竄遠方之人量移內地甲午潼川江
溢漂民居溺死者衆秋七月乙巳朔升太府監爲太府院丙午
熒惑犯氐辛亥築郊壇于麗正文明門之南丙位設郊祀署令
丞太祝奉禮協律等官癸丑以黑水新城爲靖安路甲寅太白
經天王戌命故皇兄荅刺麻八刺妃弘吉刺氏及兄子愛育黎
拔力八達即仁宗出居懷州丁卯熒惑犯房復以段貞八都馬辛
並平章政事合刺蠻子爲右丞迷而火者爲左丞也先伯參知
政事沔陽玉沙江陳州西華河皆溢八月辛巳太陰犯東咸汰
亭可孫冗員掌治筭粟者增曲阜林廟洒掃戶以尚珍署田五十頃

供歲祀乙未熒惑犯天江九月丁巳熒惑犯斗冬十月丙戌太

白經天復芍陂洪澤屯田及兩淮官地爲豪右占據者悉令輸

租已丑命兩廣以南軍與土人同戍是月帝不豫中宮秉政十

一月丁未發鈔萬錠于雲南令與貝

通考作賦

參用其貝非出本土

者同僞鈔論

通考云按雲南賦以一爲庄四庄爲手四手爲苗四苗爲橐

庚戌歲星太白填

星聚于亢癸丑歲星犯亢丙寅歲星晝見庚午祀昊天上帝于

南郊牲用馬一蒼犢一羊豕鹿各九其文舞曰崇德武舞曰定

功

通考云新建郊壇其迎送神曰天成之曲初獻奠玉幣曰欽

成之曲奉饌徹豆曰寧成之曲

以哈刺哈孫阿忽台鐵古迭兒爲三獻官省祖

宗配位壬申太白經天十二月丙子太白犯西咸地震庚寅熒

惑犯壘壁陣皇太子德壽薨己亥辰星犯建星是歲河間益

般陽諸屬隕霜殺桑二百四十餘萬本

十年丙午春正月壬寅朔高麗王王珣遣使來朝

自世祖末年高麗朝正使

不時至至是適一會焉

甲辰訪莊聖順聖裕聖三皇后儀範以備紀錄庚

戌濬真揚等州漕河令鹽商每引輸鈔二貫爲傭工費丁巳太

白犯建星戊午罷江南白雲宗都僧錄司汰其民歸州縣僧歸

各寺田悉輸租

時有白雲宗總攝所統江南爲僧之有髮者

壬戌發河南民十萬築

河防禁近侍毋輒驛召外郡官丁卯營國子學于文宣王廟西

閏月癸酉太白犯牽牛己丑犯壘壁陣甲午以鐵哥閣里阿散

並平章政事張問杜思敬月吉不花並爲中書左丞劉源參知

政事二月丙辰封孛羅爲鎮寧王戊午太陰犯氏三月戊寅歲

星犯亢嵒古王遣使來貢夏四月庚子朔詔凡匿鷹犬者沒家

貲之半來獻者給以賞辛酉填星犯亢壬戌曲靖羅雄州渠長

阿邦龍少結諸蠻爲寇平章也速帶兒捕斬之甲子倭商有慶

等抵慶元貿易以金鎧甲爲獻五月詔江南平定之後悉爲吾民比聞營利之徒以人爲市因而强畧良人及借乞養過房名色公然販鬻奸僞非一朕甚憫之自後南北往來販人客旅並行禁止經過關津盤詰得實强畧者以强盜例科斷和誘者次之至軍中所得子女出征軍官同管民官從實分揀如係良民速令完聚果係賊屬聽本管萬戶千戶出具印照如敢擅掠平民律同强盜其有欲將驅口轉行貨賣者須赴所在官司給到公據違者俱各斷罪

見典章

癸未定西番僧往還者給以舟車毋

令馳驛乙酉以塔魯忽台塔刺海並知樞密院事六月癸丑太陰犯羅堰上星己未歲星犯亢壬戌復立淮西道廉訪司秋七月庚辰太陰犯牽牛辛巳釋諸路罪囚常赦所不原者不與八月壬寅歲星犯氐熒惑犯太微西垣上將開成路地大震壞王

宮及官民廬舍壓死故秦王妃也里完等五千餘人丁巳文宣

王廟成行釋奠禮用太牢登歌樂製法服三襲命翰林院定樂

名樂章

通考云命江浙行省製造宣聖廟樂器以宋舊樂工施德仲審較應律運至京師秋八月用于廟祀先聖先令

翰林撰樂章命樂工習之降送神曰凝安之曲初獻盥洗升殿降殿望瘞皆同安之曲奠幣曰明安之曲奉俎曰豐安之曲酌獻曰成安之曲亞終獻曰文安之曲徹豆

日娛安之曲蓋舊曲也革取而詳定之耳

九月己巳熒惑犯太

微垣右執法壬午犯左執法冬十月甲辰太白犯斗青山叛蠻

紅氍毹等來附辛亥太陰犯畢甲寅犯井十一月辛未歲星犯

房壬申太陰犯虛甲戌熒惑犯亢戊子犯氐辛卯太陰犯熒惑

十二月壬寅太白晝見乙巳歲星犯東咸帝有疾禁天下屠宰

四十二日丙辰遣宣政院使沙的禱于太廟戊午太陰犯氐是

歲晉寧冀寧地震不止大同暴風雨沙道州江溢山裂平江海

嘯壤民居出鈔萬三千六百錠糧八萬七千餘石賑之

十一年丁未春正月丙辰

應作寅

朔帝大漸免朝賀癸酉崩于玉

德殿年四十二乙亥葬起輦谷是年九月乙丑加上尊諡曰欽

明廣孝皇帝廟號成宗國語曰完澤篤皇帝

冊曰蒙業以治垂拱用成忽思奮武啓釁南征末嬰寢疾
壺柄廼萌賴斯賢輔鎮側弭傾

續弘簡錄元史類編卷之五

皇清詹事府少詹事仁和邵遠平戒山學

天王三

武宗皇帝諱海山世祖皇太子真金第二子答剌麻八剌之長子成宗兄子也母弘吉剌氏答剌麻八剌子二長卽帝次愛育黎拔力八達卽仁宗帝以至元十八年七月十九日生成宗大德三年以寧遠王濶濶出總兵北邊怠於備禦命帝卽軍中代之四年八月與叛王海都戰敗之于濶別列之地五年八月又與戰于迭怯里古及合刺合塔之野師失利帝親出督戰大破之援諸王駙馬軍以出明日復戰陣少卻海都乘之帝揮戈力戰突出敵陣後海都不得志旋走死八年十月封帝懷寧王賜金印置王傳官割瑞州六萬五千戶爲食邑歲給五戶絲直鈔

二千六百錠幣帛各千匹十年七月自脫忽思罔之地踰按台

山追叛王斡羅思獲其妻孥輜重執叛王也孫禿阿及駙馬伯

顏等軍于也里的失之地受諸王禿滿明里帖木兒阿魯灰等

降海都子察八兒逃于篤哇部盡俘獲其家屬營帳冬駐按台

山降王禿曲滅復叛與戰敗之北邊悉平成宗晚年立子德壽

爲皇太子皇后伯岳吾氏

一作伯
要真氏

忌帝兄弟乃出帝母弟愛育

黎拔力八達與帝母元妃弘吉剌氏居懷州無何德壽卒成宗

寢疾無子后恐帝立修前怨召安西王阿難答及諸王明里帖

木兒入朝陰屬意安西十一年正月成宗崩丞相阿忽台平章

賽典赤八都馬辛伯顏與明里帖木兒謀奉后垂簾聽政援立

安西王潛遣師斷帝歸路母令入時帝居北邊適遣康里脫脫

入京計事丞相哈剌哈孫急令還報且恐帝遠內難將作先遣

使迎愛育黎拔力八達于懷州覲監國至則定計誅阿忽台八都馬辛賽典赤伯顏等并執阿難答明里帖木兒歸上都遣使迎帝三月帝自按台山至和林諸王勳戚畢會皆曰今阿難答等煽惑中宮陰蓄異志恐變生不測乃合辭勸進帝謝曰吾母吾弟在大都俟宗親畢會再議會帝母元妃惑于日者言欲帝讓位于其弟帝聞之謂康里脫脫曰我捍禦邊陲勤勞者十年且倫序居長術數之言茫然難信設我所爲上合天心中副民望則雖一日之短亦足垂名萬年何可以陰陽家言而遽乖祖宗之法哉此殆用事之臣擅權專殺懼罪故爲是奸謀動搖大本耳汝疾往察事機歸報我于是親帥大軍由西道諸王按灰由中道床兀兒由東道各以勁旅萬人從脫脫馳至大都入道帝言帝母愕然曰修短之說出自術家今宗王大臣議已定太

子不速來何爲復遣脫脫往促帝行至旺兀察都之地帝興中
望見之趨使同載脫脫具白母妃言且道安西謀變太弟監國
始末帝大感悟五月乙丑至上都愛育黎拔力八達侍母元妃
來會左右部諸王畢至乃廢成后出居東安州尋與阿難答明
里帖木兒並賜死甲申帝卽位于上都詔曰昔我太祖以武功
定天下世祖以文德洽海內列聖相承丕衍無疆之祚朕自先
朝肅將天威撫軍朔方殆將十載親御甲冑力戰却敵者屢矣
方諸藩內附邊事以寧遽聞宮車晏駕廼有宗室諸王貴戚元
勳相與定策於和林咸以朕爲世祖曾孫之嫡裕宗正派之傳
以功以賢宜膺大寶朕謙讓未遑至于再三間者姦臣乘隙謀
爲不軌賴祖宗之靈母弟愛育黎拔力八達稟命太后恭行天
罰內難旣平神器不可久虛宗祧不可乏祀合辭勸進誠意益

聖朕勉徇輿情於五月日卽皇帝位任大守重若涉淵冰屬嗣服之云初其輿民以更始可大赦天下免上都大都龍興差稅三年江南諸路民糧十分免三雲南八番諸甸差發全免各軍站工匠鹽場鐵冶等戶合納稅糧槩免三分被災山場湖泊課程權且停罷鐵冶許諸人煽辦蠲積逋恤鰥寡免儒戶差役命中書省續議舉貢法是日追尊考曰皇帝尊母元妃爲皇太后壬辰加知樞密院事朶兒朶海太傅右丞相哈剌哈孫太保並錄軍國重事命塔刺海爲左丞相阿沙不花明里不花並平章政事劉正爲左丞遙授欽察也先帖木兒並參知政事以塔思不花爲御史大夫朶兀兒知樞密院事特授乞台普濟平章政事朶兒赤塔海並右丞阿里左丞康里脫脫御史大夫六月癸巳朔立母弟愛育黎拔力八達爲皇太子冊曰祖宗聖緒恭承

丕顯之謨兄弟懿親宜正元良之號立天下之大本示天下以
至公咨爾母弟愛育黎拔力八達德器淵深英姿玉粹武奮清
宮之儲績文參定策之殊勳豈特華萼交輝之情式相好矣其
在烏鷲守成之治須汝贊之故於連枝同氣之間付以監國撫
軍之任茲上承於母意蓋允出於朕心特立爾爲皇太子授以
玉冊金寶維寵命之薦膺尙謙恭而自收益盡寧親之孝惟勤
事上之忠以敦九族內睦之風以衍億祀無疆之慶明日以建
儲詔天下曰朕承列聖之貽謀協宗王之翊戴必謹親賢之托
共成繼述之功母弟愛育黎拔力八達性稟溫文行全孝敬夙
著忠勤之節素明治理之方載惟靖亂之殊勳式副元良之渥
命乃遵裕皇居東宮舊制於六月朔旦授以皇太子金寶俾領
中書之務仍兼宥密之司匪特敦兄弟友愛之情實以衍宗社

隆昌之祚咨爾多方體朕至意

俱見典章

甲午建行宮于旺兀察都

立宮闕爲中都丁酉詔諸王朝會賜與悉如大德所增之數已

亥以都指揮使馬謀沙角觶屢勝遙授平章政事癸卯復置詹

事院及皇太子家令府正延慶三司典寶典膳二署甲辰以慤

刺合兒鐵木兒不花並知樞密院事丙午太陰犯南斗杓星戊

申特授孛蘭奚床兀兒並平章政事怯里木丁爲中書右丞丙

辰敕銓調軍官聽樞密院公議餘人勿得冒請軍官父子兄弟

許其相襲革外任官所帶相銜已未改封寧遠王濶濶出爲寧

王秋七月癸亥朔封諸王禿剌爲越王甲子遣大臣以卽位告

謝南郊及太廟社稷

此卽位告謝之始通考云遣御史大夫卽南郊告謝天地主用栢素質黑書又命大

樂署編通呈地祇酌獻曲及樂節翰林撰樂章

丙寅以阿保功授明里大司徒封其妻

梅仙順國夫人遣使詣西域取佛鉢舍利令天下僧誦藏經爲

三宮祈福已巳太陰犯亢置宮師府設太子師傅保賓客諭德
贊善庶子洗馬率更令丞司經令丞中允文學校書正字等官
癸酉罷和林宣慰司仍置行省左遷哈剌哈孫爲和林左丞相
命月赤察兒爲和林右丞相進爵淇陽王丁丑封諸王八不沙
爲齊王朶列納爲濟王迭里哥兒不花爲北寧王加平章政事
脫虎脫太尉命塔剌海爲右丞相塔思不花爲左丞相敎化法
忽魯丁別不花並平章中書省事庚辰以只兒合郎爲御史大
夫辛巳加封孔子尊號制曰先孔子而聖者非孔子無以明後
孔子而聖者非孔子無以法所謂儀範百王師表萬世者也朕
纂承丕緒敬仰休風循徃古之良規舉追封之盛典加號大成
至聖文宣王遣使闕里祀以太牢於戲父子之親君臣之義永
惟聖教之尊天地之大日月之明奚罄名言之妙尚資神化助

我皇元

見典章

敕中書省庶政非公議者勿奏壬午熒惑犯南斗

給和林省鈔二千錠歲收息以充公用仍以網罟賜貧民以郝

天挺孛羅答失並爲中書左丞敕樞密院御史臺宣政院許得

自選官他司悉從中書銓注近臣不得輒奏富家願出粟賑貸

者授以官庚寅置延福司八月甲午停內降旨授官乙未以烏

伯都剌參知政事甲辰出納蘭不剌所儲糧萬石賑旁近民已

酉增置詹事院參議斷事官辛亥中書右丞孛羅鐵木兒以國

字譯孝經進帝曰此孔子之微言自王公達庶民皆當由是而

行其命中書省刻板摹印諸王以下皆賜之冀寧路地震九月

甲子帝至大都

名臣奏議云武宗初卽位上都卽巡狩三不刺之地翰林學士王文用奏曰先帝新棄天下陛下

下巡狩不以時無以慰臣民望宜早還京師且臣聞人君猶北辰然居其所而衆星拱之不在勤遠畧也帝悟卽日還大都

壬申上皇考尊諡冊曰顯親所以爲子追遠所以厚民矧必百

世祀而位弗隆爲天子父而養弗逮是宜稱秩以達純誠欽惟
皇考淵穆有容神明莫測文孫文子鍾至愛于兩宮宜君宜王
膺具瞻于四海當璧之祥未卜棄蹤之跡已遙興言欲報之恩
昊天罔極對越有成之命夙夜惟寅昭哉立德之升聖矣生知
之異衍莫衍于昌後嗣而有天下孝莫孝于配前烈而茂本支
念茲繼體之初益切中心之慕謹奉玉冊玉寶上尊諡曰昭聖
衍孝皇帝廟號順宗伏惟明明降鑒序于祖宗攸躋攸寧永錫
昌祚

見元文類
程鉅夫撰

上大行皇帝尊諡冊曰臣聞稱天以誅表名實

之至公法日而名庶形容之可擬維帝王之有諡蓋今古之變
章欽惟大行皇帝稟上聖之資撫重熙之運當裕考龍升之後
承世皇燕翼之謀武威肅鎮于遐荒文德誕敷于華夏業業謹
盈成之戒愉愉盡孝敬之誠罷勤遠之兵邊燬弭而苗頑格遣

直指之使皇澤宣而民瘼除九族行敦睦之風萬國洽隆平之治爰酌奉常之典用昭告祔之文謹奉玉冊玉寶上尊諡曰欽

文廣孝皇帝廟號成宗伏惟睿靈在天孚鑒逮下茂膺典冊錫

羨邦家

見元文類張士觀撰

又上成宗后失憐答里弘吉烈氏尊諡祔成

宗室定祔廟之次太祖室居中睿宗西第一室世祖西第二室

裕宗西第三室順宗東第一室成宗東第二室

時哈喇哈孫言順宗爲成宗同

母兄其神主宜兄

先弟後帝從其議癸酉太白犯右執法甲戌改太常寺爲太常

禮儀院上乘寺爲衛尉院置皇子位典牧監典幄署典樂司丙

子奪諸王公主駙馬及諸人賜田還官并停一切賜予丁丑定

省臣官數依舊制爲十二員右丞相塔剌海左丞相塔思不花

平章昧兀兒乞台普濟如故以阿沙不花塔失海牙平章政事

孛羅答失劉正爲右丞郝天挺也先鐵木兒爲左丞于璋烏伯

都刺參知政事其班朝諸司冗員並從察汰乙卯太白犯左執

法甲申議立尚書省分理財用命脫虎脫敎化法忽魯丁任省

事俾自舉官屬臺臣言至元中阿合馬桑哥相繼立尚書省事

敗併入中書頃爲綜理財用又復立之勢必增置有司濫設官

吏無益帝曰卿言良是但此三臣者願任其事姑聽其行

典章云江

所創禁荆湘淮右毋過羅

冬十月乙未升典寶署爲監典瑞利用二監爲院

乙巳太白犯亢甲寅太陰犯明堂丙辰以買奴知樞密院事敕

行省平章總督軍馬得佩虎符其左丞等所佩者悉追納十一

月癸亥封諸王牙忽都爲楚王丙寅帝朝皇太后于隆福宮上

玉間玉寶丁卯太白犯房乙亥禁軍站鷹坊控鶴等戶毋冒占

氓田苛免徭役丙子太陰犯東斗乙酉犯亢庚寅賜太師月赤

察兒江南田

時賜王悉奪還官帝以月赤察兒積有勲勞非餘人比故加特賜

詔皇太后軍民

人匠等戶賦役並隸徽政院辛卯辰星犯歲星十二月壬辰朔

敕金虎符及金銀符非山中書省勿給

舊制金銀虎符與瑞院掌之中書省給之事畢

則仍歸典瑞院後出入多不山中書下至商人結托近侍奏命請濫給以致有出無歸自後除官及奉使應給者必由中書命

留守司以來歲正月十五日起燈山于大明殿後延春閣前丁

巳以歲歉命宣政院省佛事罷工役庚申以改元赦天下詔曰

仰惟祖宗應天撫運肇啓疆宇華夏一統罔不率從逮朕嗣服

丕圖繼膺景命遵承詒訓恪守洪規永思創業之艱未知攸濟

重念萬幾之統在予一人故自卽位以來溥從寬大量能授官

俾勤乃職夙夜以永康兆民爲急務間者歲比不登流民未復

官吏並緣侵漁上下有乖和氣是以責任股肱耳目大臣思所

以盡瘁贊勸嘉猷朝夕入告朕命惟允庶事克諧樂與率土之

民共享治安之效邇寧遠肅頓不遑與可改大德十二年爲至

大元年誕布惟新之令式孚永固之休於戲建元立極旣正始
於王春經世裕民尚仰承於台輔庶幾中外同底和平是歲江
浙饑民艱漕粟令湖廣江西各輸五十萬石並山海道達京師
杭州一郡歲釀酒糜米麥二十八萬石至是有禁

至大元年戊申春正月辛酉朔曲赦御史臺見繫犯贓官吏止
徵賦罷職癸亥發六衛軍萬八千五百人供旺忽察都建宮工
役甲子授阿沙不花右丞相行御史大夫事丙寅罷行都水監
辛未帝欲以中衛親軍隸皇太子辭曰世祖立五衛以應五方
去一不可乃摘各翼漢軍萬人別立一衛爲東宮衛兵立衛率
府甲戌禁進海東青鵠者托言驛騎不敷擅括民馬戊子改徽
政院人匠總管府爲繕珍司升中尚監爲院尚舍監爲寺己丑
國王出伯進玉六百餘觔賜金銀鈔厚答之罷河西采玉夫遣

使巡行諸道共議弭盜方畧或匿盜不聞或期會不至或踰期不獲者官吏連坐二月癸巳改應坊爲仁虞院以右丞相脫脫等爲院使丙申立尚服院設尚冠尚衣尚輦尚沐尚輦尚飾六率御隸之更立甄用監隸徽政院驥用資武二庫隸府正司壬寅改詹事院使爲詹事副詹事爲少詹事院判爲詹事丞三月乙丑太陰犯井以和林北來貧民八十六萬八千戶仰食于官非久計分賑鈔二百萬錠罷其廩給就令屯田丁卯爲皇太后建興聖宮復立白雲宗懽所戍寅以脫脫木兒平章政事己卯命翰林國史院纂修順宗成宗實錄封阿沙不花康國公三寶奴渤海國公教化魏國公曲出應國公加鉞木迭兒也兒吉尼並右丞相遣米楫等使蘓魯國夏五月丙寅降英德路爲州丙子禁白蓮社毀其祠還其人隸民籍甲申立大同廣武康里三侍

衛視軍都指揮司六月己丑加三寶奴錄軍國重事曲出太子
太保脫脫太尉大慈都平章軍國重事丁酉隴西寧遠縣地震
烏撒烏蒙三日之中地大震者六封藥木忽兒爲定王乃蠻帶
爲壽王加宦者李邦寧大司徒遙授左丞相仍領太醫院事秋
七月庚申有流星起自勾陳南行圓若車輪微有銳經貫索而
滅救以金銀歲入數少自今毋問何人以金銀奏請及託人轉
奏者皆抵罪壬戌禁鷹房于大同龍興諸地縱獵擾民築呼鷹
臺於瀟州澤中鴻雪錄云南海子本元之飛放泊元制大都入
宣德府捕兔有禁以天鵝鵝鵝仙鶴鵝私賣者卽以其家婦
子給捕獲之人有于禁地圍獵爲奴婢首出者斷奴婢爲良民
改住爲鵝同就近官司送納喂以新羊肉無則易以旺忽察都
鷄自正月一日至七月二十日禁不打捕者爲令
行宮成立中都留守虎賁二司辛未立御香局建香殿壬申太
自犯左執法癸未樞密院言世祖時設院官六員成宗時增至

十三員今署事多至三十二員非制敕罷塔思帶等十一人乙酉以秦虎人徹兒怯思爲監察御史八月以命相詔天下曰中書政本也軍國之務小大由之朕自卽位以來屬精求治爰立輔相以總中書期年于茲大効未著豈選用之未當與何萬幾之猶繁而羣生之寡遂也今特命左丞相塔思不花爲中書右丞相太保乞台普濟爲中書左丞相統百官平庶政便者舉行弊者革去一新條理大小機務並聽中書省區處諸王貴戚不得阻撓近侍官屬及內外諸司事不由中書議者毋隔越聞奏外任官非奉朝命毋擅離職赴都營求私事各省水旱饑荒已嘗遣使分賑其至大元年差發夏稅並行蠲免大江以北百姓供億繁勞包銀俸鈔輸納實爲偏重自大德十一年爲始悉予除豁諸站赤消乏逃亡者應速僉補管站頭目有私自典買站

戶親屬男女者勒令完聚價不追償

見典章

戊申立中都萬億庫

置寧夏河渠司九月丙辰中書省言夏秋之間鞏昌地震歸德

暴風秦安濟寧真定大水江浙饑疫癘大作臣等不才願退位

以避賢路帝曰菑害事有由來非爾所致爾等但當慎其所行

壬戌泉州大賈進沉檀異木可構宮室者敕江浙省驛致京庚

辰諸王禿滿進所藏太宗玉璽進封陽翟王癸未太陰犯熒惑

遣使諭薛迷思干部冬十月癸巳蒲縣陵縣地震甲午以阿沙

不花知樞密院事罷大都樞密辛丑太白犯南斗癸卯發湖廣

米十萬石貯揚州江西海漕米五萬石貯朱汪利津二倉濟山

東饑甲辰加鐵木兒不花錄軍國重事禿忽魯也速脫孛花並

知樞密院事以西僧教瓦班爲翰林承旨改護國仁王寺昭應

觀運總管府爲會福院十一月庚申太白晝見增官吏俸以至

元鈔給之停其祿米歲省米四十萬石吏員以九十月出身如舊制詔免被災田租凡佃戶止輸田主十分之四丁卯中書省言銓選錢穀他司乞毋干預帝曰已降制書令諸人勿干中書之政他日或有乘朕遺忘持內降文記及傳旨至中書者其執之以來朕將加罪已已命脫脫爲左丞相也兒吉尼爲御史大夫大慈都爲太子詹事以國用不給汰宣徽太府利用等院遣使覈天下屯田凡一百二十餘所令同行省宣慰官親履其地具籍以聞癸未皇太后造寺五臺山摘軍六千五百人供役閏月丙申罷江南進沙糖遼陽進雕豹止富民輸粟授官例乙巳詔虎符國之信器驛券使臣所需凡西域賈人名求珍異請給者槩行追收丁未罷順德廣平鐵冶提舉司立汴梁之項城中都之開寧縣敕河西僧戶準先朝定制從軍輸稅一與民同甲

寅故丞相哈刺哈孫卒

典章云敕民間厚葬有用金銀寶玉器玩者以不孝治罪

十二月庚

申封和郎撒爲隴王降龍興爲源州升蔚州爲蔚昌府省河東
宣慰司以大同路隸中都留守司冀寧晉寧二路直隸中書省
甲戌賜御史臺及監察御史宴服命有司贖饑民所鬻子女召
吳澄爲國子監丞是歲月赤察兒進攻叛王子察八兒諸部相
率來降漠北平江浙饑賑米五十三萬五千石鈔十五萬四千
錠麵四萬觔又流民百三十三萬九百五十戶賑米五十三萬
六千石鈔十九萬七千錠鹽折直爲引五千令行省行臺遣官
臨視益都水民饑采草根以食免今歲差徭仍以本路稅課及
發朱汪利津兩倉粟賑之

二年己酉春正月辛卯皇太子諸王百官上帝尊號冊曰昔我
世祖旣平炎趙質之於書幅員廣長振古無倫覆燾之下八紘

萬國莫敢不庭何獨一王西北岸然憑道阻修方命正朔德綏
之而不摯威董之而不讐夫豈不能聲罪致罰深入其地終以
聖人親其宗親包荒有年成宗繼序憤久驚頑天鑒昭明於裕
皇孫獨異陛下授以信寶撫軍漠北是固以張足付神器之本
時未及寇乘命卽行其視萬里莽閫寒冽之鄉不遠不難如堂
適庭至則獎厲諸軍修明法紀簡拔果毅均苦分勞解衣煖寒
兼食飫饑洗洗汔汔士氣日作睿算伐謀待寇歲至奪人以先
身踐戎行霆馳電擊大北其羣虛已不矜日慎一日始終十年
不挫屢勝狂狡不懲悉銳來加當以選鋒用間出奇盡襲輜重
彷徨無歸度不能軍耄倪紫纒降口百萬致茲枚寧平四十年
未靖之梗成兩祖宗未究之志天下之人聞其風聲思覩天光
者顙顙翹翹九圍一心握是乾符歸正宸極弛武事之夙習洽

新化以文治立愛自親曾未旬浹上尊太后問安以時下建儲

宮庶政是先又舉列聖未遑之典欽崇元祀玉璫黃流薦祿太

室還蹕龍輿徘徊太祖龍旂九旂勸金于斯肇基帝業爲城中

師又以孔子垂範百王將二千年而顯謚未稱加大成於至聖

文宣王上立勞於軍與凡庭臣悉大賚之間歲不登旣賑旣恤

虞施未博民罹罪罟再肆大宥至德難名赫赫巍巍惟天爲大

掛一漏萬井觀如斯求可盡臣下歸美報上者惟是徽稱謹奉

玉冊玉寶上尊號曰統天繼聖欽文英武大章孝皇帝欽惟陛

下立心天地立極生民茂對鴻名于億萬年

見牧菴文集

乙未越王

禿剌有罪賜死乙巳追奪自大德六年至至大元年内降璽書

不由中書直下翰林院頒給有干田土戶口銓選獄訟害民妨

政者凡六千三百餘道二月大赦詔曰朕荷三靈之隆眷承列

聖之不基永言置器之難恒切履水之慎廼者皇太子率中外
臣庶僉謂撫軍十載遐裔悉平當宁九重成規具舉若稽舊典
合進徽稱豈朕躬所克當惟祖武之顯式已于正月七日御大
明殿受尊號越五日躬詣太室恭謝訖爰念卽位以來恒以賑
災恤民爲務而恩澤猶未溥博流離猶未安集豈有司奉之不
至與今特命中書省遴選內外官僚專以撫治爲事簡汰冗員
樽節浮費一新政理斯稱朕意於戲薦鴻名而嚴寶冊既俯徇
於輿情肆大賚以濟黎元其博加於實惠尚賴宗親近輔羣辟
庶司勉効忠勤同躋康乂諭大司農司總挈天下農政設學校
以養人材積義糧以備凶歲滋養栽植興舉水利賞勤罰惰期
于敦本抑末管民官依時勸課廉訪使年終考其殿最類申大
司農司以定黜陟務崇實效毋事虛文

俱見
典章

癸亥罷行泉府院

以市舶歸行省己巳太陰犯亢辛未犯氐壬申定各衛董屯田
官三年一易三月己丑封諸王也不干爲襄寧王辛卯罷杭州
白雲宗攝所立湖廣頭陀禪錄司以和林屯糧去秋收至十萬
石賞其官吏軍士有差戊戌太陰犯氐己亥熒惑犯歲星夏四
月辛酉立興聖宮江淮財賦總管府癸亥摘漢軍五千給田十
萬頃於直沽汾海屯種立鎮守海口屯儲親軍都指揮司壬午
創中都皇城角樓五月丁酉以陰陽家言權停各寺及亭苑鷹
坊工役甲辰敕自今乘輿北幸以丞相一人留守京師著爲令
六月癸亥遣官督捕蝗與章云蝗不食豆苗勸民多種豌豆或取鵬雪煮馬骨放水冷浴諸種子生苗
不食禁諸賜田者馳驛徵租庚午選大都隸儒籍者四十戶充
文廟樂工甲戌以宿衛士多漢人南人投充避役濫請衣糧敕
遵舊制止存蒙古色目之有閭閻者餘並革去乙亥宣政院奏

免僧道也里可溫答失蠻租稅帝曰田有租商有稅乃祖宗成
法一體奏免非制依舊徵之秋七月癸未河決歸德封丘壬辰
松潘疊宕威茂等處安撫司管內西番禿魯卜降胡漢民四種
雜處遣官往蛇谷隴迷招降其八部得萬七千戶改設宣撫司
治茂州徙松州軍鎮其地乙未復置龍南安遠二縣隸潁州已
亥樂實請更鈔法圖新鈔式以進且與保八謀立尚書省帝命
與乞台普濟塔思不花脫虎脫集議保八言政事得失皆前中
書省臣所爲今欲舉正彼懼有累孰願行者若立尚書省必使
舊事從中書新政從尚書力薦乞台普濟脫虎脫等任其事塔
思不花言此大事遠爾更張乞與老臣更議帝不從八月癸酉
復立尚書省以乞台普濟爲右丞相脫虎脫爲左丞相三寶奴
樂實平章政事保八爲右丞忙哥鐵木兒爲左丞王禰郝彬參

知政事立皇太子右衛率府

志作延祐年間事
今依本紀載此

詔修甘肅城城

中多積金粟以給諸王軍馬復立瓜沙州屯田已卯三寶奴言
中書省尚有逋欠錢糧應追理者宜存斷事官十人餘皆併入
尚書省至尚書省既立更新庶政用官六十四員其中有品秩
未相當或從未歷仕者乞弗拘例帝皆從之且敕天下敢有阻
撓尚書省事者罪勿追九月庚辰朔頒尚書省條畫於天下曰
三載考績三考黜陟幽明此古者責成悠久之道今路州司縣
親民正官定以九年爲滿歲考治功以示黜陟有撫字盡心百
姓安阜鈔法流通政事卓越者不次旌擢其不盡職而有私犯
者懲以重罪至風教所行有關人心世道令所司表率敦勸以
復淳古如有子証父奴言主及妻妾弟姪干名犯義者一切究
治其學校之設所以明人倫養賢才爲政之要莫先于此諸正

官當躬親勉勵各得其才以備選舉凡在學儒生課講不輟者與免雜泛差役官府大小公事已立有限程民間詞訟尤當用心平允比來徃徃背公徇私變亂是非逗遛不決以致民怨莫伸今後各務依理處斷毋得淹延歲月官僚執見不同者許各出所見申聞上司詳勘違者監察御史廉訪使糾治見典章改各行中書省爲行尚書省頒行至大銀鈔詔曰昔我世祖旣登大寶始造中統交鈔以便民用歲久法墮亦旣更張印造至元寶鈔逮今又復二十三年物重鈔輕不能無弊廼循舊典改造至大銀鈔頒行天下至大銀鈔一兩準至元鈔五貫白銀一兩黃金一錢隨路立平準行用庫買賣金銀倒換昏鈔或民間絲綿布帛赴庫回易驗時估給價諸路府州縣設立常平倉以權物價豐年廣收粟麥米穀值青黃不接之時減價出糶以遏沸湧

金銀私相買賣及海舶興販金銀銅錢綿絲布帛下海者並禁之中統交鈔詔書到日限一百日內盡數赴庫倒換茶鹽酒醋

商稅諸色課程如收至大銀鈔以一當五頒行至大銀鈔自二

兩至一釐定爲一十三等以便民用

元鈔法至是凡三變大抵至元鈔五倍於中統至大

鈔又五倍於至元未及期年仁宗卽位卽罷

銀鈔而中統至元二鈔終元之世蓋常行焉壬午江南行臺劾

平章教化詭言家貧冒受賜物折鈔二萬錠且其人素無一善

可稱命奪魏國公爵癸未從尚書省言省部諸務皆聽便宜處

置大事或須上請得旨卽行累朝格例前後不一吏得輕重任

情自太祖以來所頒政令九千餘條刪除繁冗編爲定制癸巳

以大都城南建佛寺立行工部令丞相脫虎脫兼領以冀寧大

同保定真定當五臺山建寺所須直取於民免今年田租己亥

罷中統鈔以至大銀鈔爲母至元鈔爲子仍撥至元鈔本百萬

錠以給國用立資國院于大都泉貨監于諸省設提舉司十九
于產銅之地鑄錢曰至大通寶者每一文準銀鈔一釐曰大元
通寶者每一文準至大錢十文以歷代銅錢與至大錢相參通
用綱目云初行鈔時雖皆以錢爲文而廢錢弗鑄今始行錢法其當五當三折二並以舊數用之從尚書省言
三宮內降之旨仍舊準行儻於大事有害則令復奏中書政務
盡歸尚書省聽其任人惟宣敕散官仍委中書海外占八國來
貢白而象伽藍木遣使分往不憐八孫八昔占八諸國甲辰立
度支院掌芻粟奪江南賜田千二百三十頃得租五十萬石充
官用禁貴戚家養豹冬十月庚戌朔大赦詔曰朕自臨御以來
下詔萬方其所以撫安元元者亦已至矣而前歲江浙饑疫今
年蝗旱相仍民或盡死幸生者流離道路雖嘗遣使分道賑濟
恐未能徧夫旣罹是天刑輕觸憲網者必衆有司槩以重法繩

之朕實憫焉其自十月日昧爽以前中外罪囚大辟以下已未

發覺並從釋免流民轉徙無常有司加意存恤遺骸暴露者官

爲收瘞親民官不得取借部下錢債違者計贓論罪

見典章

命皇

太子兼尚書令丙辰從樂實言質江南富民子爲軍有歲收糧

五萬石以上者每石輸二升於官半備凶年半養衛士辛酉弛

酒禁立酒課提舉司癸亥以布里牙敦爲御史大夫乙丑皇太

后有疾釋天下重囚壬申太陰犯左執法加知樞密院事禿忽

魯左丞相丁丑命阿散爲尚書左丞相伯都平章政事忽都不

丁爲右丞鐵里脫歡賈鈞並中書參知政事戊寅御史臺言常

平倉本以益民然歲比不登立之必反害民至大銀鈔初行燕

日繁碎民猶未曉又兼行銅錢慮有相妨民間拘銅器甚急弗

便又歲凶乏食不宜遽弛酒禁不報發御史臺贓鈔萬錠賑凶

東饑改昔寶赤八刺合孫總管府爲奉時院十一月庚辰朔以散术帶爲平章政事商議樞密院事己亥太陰犯右執法庚子犯上相發至大鈔二千錠于江浙河南江西湖廣和糴得糧百萬石丙午諸王孛蘭奚以私怨殺人當死帝曰國族也杖之流北鄙從軍丁未擇衛士子弟充國子學生十二月乙卯帝親饗太廟加上太祖聖武皇帝尊諡曰法天啓運光獻皇后曰翼聖

本傳作至元二年上諡

睿宗景襄皇帝曰仁聖莊聖皇后曰顯懿執事者

人升散階一等賜太廟禮樂戶鈔帛有差

通考云始製先農樂章以太常登歌樂祀

之武昌婦劉氏訴三寶奴奪其所進亡朱玉璽夜光珠下省臺

雜問得喬瑜誣捏狀帝命斬喬瑜杖劉氏庚申太陰犯參壬戌

陽曲縣地震定內外官三品以上者許請諡若勳戚大臣特旨

賜諡者不在此例

通考云至元初頒農桑雜令是年淮西廉訪苗好謙獻種蒔之法其說分農民爲三等上

戶地一十畝中戶地五畝下戶二畝或一畝皆築垣墻圍之以時收穫桑柘依法種植市善而行之其法出齊民要術等書

三年庚戌春正月癸未汰中書省官吏自客省使而下一百八

十一員聽尚書省遷敘

通考作三百員

乙酉徵李孟入見謂宰臣曰此

皇祖妣命爲朕賓師者特授平章政事同知樞密院事丁亥白

虹貫日巳丑以紐隣參議尚書省事辛卯立皇后弘吉刺氏遣

脫虎脫攝太尉持節授玉冊玉寶癸巳立中瑞司掌皇后寶司

禮監管巫覡甲午太陰犯右執法乙未制諸色課程自大德十

一年較定舊額新增總爲正額折至元鈔作數以至大三年爲

始徵辦餘止十分爲率增及三分以上爲下酬五分以上爲中

酬七分以上爲上酬九分者爲最不及三分者爲殿稅課官萬

錠之上設正同副提舉各一員千錠之上設提領大使副使各

二員五百錠以上半之百錠以上不設提領丙申復立廣平順

德路鐵冶都提舉司湖廣乖西帶蠻阿馬等入寇乙巳省樞密
院官存知樞密院七員同知院事二員副使二員僉事二員同
僉院事一員增御史大夫中丞侍御史治書侍御史各二員省
通政院官六員止存十二員二月辛亥癸亥犯月星巳未浚會
通河增大都警巡院分治四隅壬戌太陰犯左執法丁卯從尚
書省言以至元鈔輸萬億庫銷毀其板止以至大鈔與錢相權
通行壬申以樂實爲尚書左丞相駙馬都尉封齊國公乙亥太
白犯月星三月巳卯朔定收支數目各以零就整至元鈔以釐
爲二至大銀鈔以毫爲止斛以合爲止權以分爲止度以寸爲
止其絲忽微塵抄撮圭粒等數並行削去以省繁文

見典章

庚寅

太陰犯氏壬辰立典聖宮章慶司以江浙財賦府及瑞州營民
司並隸焉丙申太陰犯南斗丁未太白犯井夏四月巳酉四川

容米洞官田墨糾衆爲亂遣承順安撫使梓材往招之戊辰太
白晝見改大承華普慶寺總管府爲崇祥監丙子增國子生爲
三百員封諸王完者爲衛王六月丁未朔以幹赤爲中書左丞
忽都不丁爲右丞己酉立上都中都及雲州銀冶提舉司庚戌
立規運都總管領大崇恩福元寺錢糧乙卯太陰犯氐丁巳諭
脫虎脫三寶奴總治百司庶務並從尙書省奏行壬申遣使諸
道慮囚秋七月戊寅太陰犯右執法己卯犯上相封皇伯晉王
長女寶答失憐爲韓國長公主庚寅給親民長吏考功印曆令
監治官歲終驗其政績書而上之廉訪司御史臺尙書禮部考
校以定黜陟己亥禁權要商販挾聖旨懿旨令旨阻礙官河民
船八月丁未以忽剌出釐日並爲御史大夫甲寅白虹貫日九
月己卯平伐蠻長不老丁遣使來降卽其地立安撫司辛巳太

陰犯建星辛卯犯天廩壬辰司徒劉夔乘驛至江南省親二年
不歸詔削籍庚子帝諭尙書省曰去歲中書省奏諸司官遵大
德十年定制濫者汰之今員冗如故有不以聞而徑之任者有
不奏而擅令之任者並逮捕之朕不輕釋冬十月甲辰朔太白
經天丙午太白犯左執法定今歲冬至祀圜丘尊太祖配來歲
夏至祀方丘尊世祖配朝日夕月于春秋二仲舉行其太廟祠
祭故用瓦尊者以銀代之戊申帝朝興聖宮上皇太后尊號曰
儀天興聖慈仁昭懿壽元皇太后癸丑熒惑犯亢甲寅諭中外
民戶託名諸王妃主規避徭役者俾充驛卒及築城夫郡縣官
失察者罷職丁巳詔減宮人膳尙書省言宣徽院廩給日增儲
待不給帝曰比見後宮飲饌與朕無異有是理耶其使宣徽使
覈實減之辛酉以皇太后受尊號赦天下大都上都中都較他

郡供給煩擾與免至大三年秋稅其餘至大二年以前民欠錢糧悉從蠲免內外不急之役截日停罷民間雜差先儘游食之徒次從工賈末技其力田之家勿奪農時官民田土各有所屬諸人勿得陳獻民官公罪許罰贖杖徒以下並原有從三寶奴言省部官自今晨集暮退怠者不俟奏聞便宜加罪其到任一再月卽辭病者杖罷不敘發鈔二百錠規運取息以供尙書省膳丁卯封諸王木八剌子買住韓爲充王雲南省丞相鐵木迭兒擅離職赴都有旨詰問以皇太后故貸免令復職以丞相帖古迭兒爲陝西行臺御史大夫十一月甲戌朔太白犯亢辛巳封三寶奴楚國公加脫虎脫太師錄軍國重事封義國公壬午改大崇恩福元寺規運總管府爲隆禧院丁亥太陰犯畢戊子以益都寧海諸處連歲饑罷鷹坊圍獵容米洞田墨來降授

沙寨千戶城中都丙申有事于南郊以太祖皇帝配享昊天

帝五方帝日月星辰從祀

通考云令大樂署製配位及親祀曲譜舞節翰林院撰樂章

已亥

尙書省以武衛都指揮使鄭阿兒思蘭段叔仁等圖不軌誣服並棄市十二月甲辰朔立崇輝署隸宣政院戊申冀寧路地震是歲襄陽峽州大水山崩壞官廨民居二萬一千八百間死者三千四百餘人計口賑糧兩月死者給以槥

四年辛亥春正月癸酉朔帝不豫大赦庚辰崩于玉德殿壽三十一壬午葬起輦谷夏五月上尊諡曰仁惠宣孝皇帝廟號武宗國語曰曲律皇帝閏七月丙午祔于太廟

冊曰北藩入嗣三官協和慨然創治爵濫賞阿貳省亂政令教繁詔有爲何裨變政已多